

I. DISPOSICIÓN XERAIS

MINISTERIO DE XUSTIZA

18912 *Real decreto 1611/2011, do 14 de novembro, polo que se modifica o Real decreto 95/2009, do 6 de febreiro, polo que se regula o sistema de rexistros administrativos de apoio á Administración de xustiza.*

Mediante o Real decreto 95/2009, do 6 de febreiro, regulouse o sistema de rexistros administrativos de apoio á Administración de xustiza, un de cuxos obxectivos fundamentais é proporcionarlles a xuíces, fiscais, secretarios xudiciais e á policía xudicial as ferramentas necesarias para o exercicio das funcións que teñen encomendadas. Este real decreto proporcionaba, ademais, o marco xurídico necesario para a integración dos diferentes rexistros existentes mellorando así a calidade da información e simplificando as tarefas dos diferentes usuarios.

A regulación por primeira vez da responsabilidade penal das persoas xurídicas operada pola Lei orgánica 5/2010, do 22 de xuño, pola que se modifica a Lei orgánica 10/1995, do 23 de novembro, do Código penal, incide de xeito directo na organización do sistema de rexistros que, para o mellor cumprimento das funcións antes sinaladas, debe adaptar o seu funcionamento ao mandato derivado destas normas, desenvolvendo as funcionalidades necesarias para incorporar ás correspondentes bases de datos a nova información exixida. De acordo coa experiencia alcanzada durante o período de funcionamento do Real decreto 95/2009, do 6 de febreiro, polo que se regula o sistema de rexistros administrativos de apoio á Administración de xustiza, parece igualmente aconsellable matizar a forma en que os interesados deben acreditar a personalidade e, de ser o caso, a condición de representante legal cando soliciten acceso á información contida no sistema de rexistros para os efectos da súa posible cancelación ou rectificación.

Sobre este real decreto emitiron informe o Consello Xeral do Poder Xudicial, a Fiscalía Xeral do Estado, a Axencia Española de Protección de Datos e o Consello do Secretariado.

Na súa virtude, por proposta do ministro de Xustiza, logo de aprobación do ministro de Política Territorial e Administración Pública, de acordo co Consello de Estado e logo de deliberación do Consello de Ministros na súa reunión do día 11 de novembro de 2011,

DISPOÑO:

Artigo único. *Modificación do Real decreto 95/2009, do 6 de febreiro, polo que se regula o sistema de rexistros administrativos de apoio á Administración de xustiza.*

O Real decreto 95/2009, do 6 de febreiro, polo que se regula o sistema de rexistros administrativos de apoio á Administración de xustiza, queda modificado como segue:

Un. A alínea a) do artigo 8 queda redactada como segue:

«a) Datos identificativos.

Nome e apelidos do condenado, rebelde, sometido a medidas de seguranza ou medida cautelar, alias de ser o caso, sexo, data de nacemento, nome dos pais, localidade, provincia, país de nacemento, domicilio coñecido, nacionalidade e documento nacional de identidade ou NIE, pasaporte ou tarxeta de identidade no caso dos estranxeiros, número ordinal informático policial e número de atestado.

En relación coas persoas xurídicas farase constar a razón ou denominación social, nacionalidade, domicilio social e domicilio fiscal, actividade principal, tipo de sociedade, número ou código de identificación fiscal e datos rexistrados.

No suposto de entes sen personalidade xurídica, farase constar denominación, número ou código de identificación fiscal ou calquera outro dato que sirva para a súa identificación.

Cando nunha mesma causa resulten condenadas persoas físicas e persoas xurídicas ou entes sen personalidade, farase contar esta circunstancia no sistema de rexistros de apoio á Administración de xustiza.»

Dous. O artigo 9 queda redactado do seguinte xeito:

«Artigo 9. *Información contida na inscrición de sentenzas firmes.*

Cando se trate de sentenzas firmes que impoñan penas ou medidas de seguranza a persoas físicas maiores de idade, penas a persoas xurídicas ou consecuencias accesorias a entes sen personalidade, inscribíranse, ademais, os seguintes datos:

- a) Data da sentenza que impoña a pena ou medida de seguranza.
- b) Data de firmeza da sentenza.
- c) Órgano xudicial sentenciador.
- d) Condición de reincidente e/ou reo habitual do condenado, se é o caso.
- e) Órgano xudicial de execución da sentenza, se é o caso.
- f) Número e ano da executoria.
- g) Delito ou delitos e precepto penal aplicado.
- h) Pena ou penas principais e accesorias, medida de seguranza e a súa duración, e contía da multa con referencia á súa duración e cota diaria ou multa proporcional.
- i) Data de comisión do delito.
- j) Participación como autor ou cómplice e grao de execución.
- k) Substitución das penas ou medidas de seguranza, se é o caso.
- l) Suspensión da execución das penas ou medidas de seguranza, se é o caso, data de notificación, así como prazo polo que se concede a suspensión.
- m) Prórroga do auto de suspensión das penas.
- n) Data da revogación do auto de suspensión das penas ou medidas de seguranza.
- ñ) Data da remisión definitiva da pena, cumprimento efectivo desta ou prescrición.
- o) Data do cesamento da medida de seguranza.
- p) Expulsión e data desta, cando se acorde como substitución da pena ou medida de seguranza.
- q) Cumprimento.
- r) Acumulación de penas.
- s) Responsabilidade civil derivada da infracción penal.
- t) Resolucións xudiciais que se pronuncien sobre o traslado da pena, de acordo co artigo 130.2 da Lei orgánica 10/1995, do 23 de novembro, do Código penal.»

Tres. O artigo 10 queda redactado do seguinte xeito:

«Artigo 10. *Información contida na inscrición de medidas preventivas, requisitorias, autos de rebeldía ou sentenzas non firmes.*

Cando se trate de medidas preventivas, requisitorias, autos de rebeldía ou sentenzas non firmes impostas a persoas físicas maiores de idade e, de ser o caso, a persoas xurídicas e entes sen personalidade, inscribíranse, ademais, os seguintes datos:

- a) Medidas cautelares, persoais ou reais e ordes de protección nos procedementos de violencia doméstica ou de xénero, indicando data de adopción,

de notificación ao sometido á medida ou orde de protección e de cancelación e, se é o caso, tipo, contido, ámbito e duración, así como as súas modificacións ou substitucións, e delito ou falta obxecto do procedemento. En relación coas ordes de protección, indícarase a situación e orixe da solicitude.

b) Sentenzas non firmes, indicando o órgano axuízador, procedemento, data da sentenza e, se é o caso, delitos ou faltas declaradas, penas ou medidas de seguranza impostas e a súa duración ou contía.

c) Ordes de busca, indicando o órgano xudicial que a acorda, data da orde, tipo de procedemento, delito obxecto do procedemento, pena e duración desta.

d) Ordes europeas de detención e entrega emitidas polas autoridades xudiciais españolas.

e) Auto de rebeldía, indicando data do auto e da súa anulación».

Catro. As alíneas b) e c) do artigo 16 quedan redactadas como segue:

«b) O encargado dos rexistros integrados no sistema de rexistros administrativos de apoio á Administración de xustiza informará as autoridades de Estados estranxeiros, nas formas e nos supostos que determinen as normas comunitarias e os tratados internacionais de asistencia xudicial en materia penal subscritos por España, sobre as sentenzas condenatorias firmes impostas a persoas físicas maiores de idade relativas a estranxeiros ou españois das cales exista constancia e, se é o caso, a persoas xurídicas e entes sen personalidade.

c) O encargado dos rexistros integrados no sistema de rexistros administrativos de apoio á Administración de xustiza, sempre que non se trate de información reservada a xuíces e tribunais, informará igualmente dos datos contidos nas inscricións dos rexistros centrais de penados, de medidas cautelares, requisitorias e sentenzas non firmes, de protección das vítimas de violencia doméstica e de rebeldes civís, por instancia de calquera órgano das administracións públicas ante o que se tramite un procedemento no cal sexa preceptivo este certificado para acceder a un dereito ou adquirir unha condición determinada con consentimento do interesado, sexa esta persoa física, xurídica ou ente sen personalidade, manifestado directamente ou a través do seu representante, salvo que unha norma con rango de lei o exceptúe. A dita información limitarase unicamente aos datos relativos á persoa física, xurídica ou ente sen personalidade interesado no procedemento».

Cinco. Os números 2 e 4 do artigo 17 quedan redactados do seguinte xeito:

«2. As certificacións poderanse solicitar respecto de un ou de varios rexistros integrados no sistema ou respecto de todos eles. Se se tratar de persoas xurídicas, entes sen personalidade ou menores de idade, a solicitude deberaa efectuar, en todo caso, o seu representante legal. A certificación positiva conterà a transcripción dos datos inscritos, tal e como consten no rexistro no momento da súa expedición, excluindo as inscricións que, conforme unha norma con rango de lei, estean á disposición unicamente dos órganos xurisdiccionais.

4. Os titulares interesados poderán solicitar e recibir por correo o certificado correspondente aos seus datos persoais ou da persoa xurídica ou ente sen personalidade de que se trate; no caso de persoas xurídicas e dos entes sen personalidade, a solicitude deberá formulala o seu representante legal. Mediante orde do ministro de xustiza determinaranse os requisitos e as condicións para que as ditas solicitudes se poidan tramitar por vía electrónica».

Seis. Os números 1 e 2 do artigo 18 quedan redactados do seguinte xeito:

«1. A cancelación das inscricións practicarase de oficio, por instancia do titular interesado ou por comunicación do órgano xudicial.

Correspóndelle ao Ministerio de Xustiza resolver o procedemento para a cancelación das inscricións, calquera que sexa a forma de iniciación do procedemento.

2. Os titulares interesados poderán solicitar a cancelación ou rectificación dos seus datos contidos no sistema de rexistros administrativos de apoio á Administración de xustiza do Ministerio de Xustiza. Para estes efectos, dirixirán unha solicitude na cal se fará constar nome e apelidos, filiación, localidade, provincia, data de nacemento e documento nacional de identidade, NIE ou tarxeta de identidade ou pasaporte no caso de estranxeiros, todos eles en vigor, e xuntarase ao modelo de solicitude o orixinal dos documentos anteriores ou copia compulsada destes. No caso de persoas xurídicas ou entes sen personalidade, nome e apelidos do representante, documento nacional de identidade, NIE ou tarxeta de identidade ou pasaporte no caso de estranxeiros, todos eles en vigor, e xuntarase ao modelo de solicitude o orixinal dos documentos anteriores ou copia compulsada destes, así como a documentación que acredite a súa condición de representante legal. Na solicitude deberase facer constar de xeito obrigatorio un domicilio para os efectos de notificacións. Mediante orde do ministro de Xustiza determinaranse os requisitos e condicións para que estas solicitudes se poidan tramitar por vía telemática».

Disposición adicional única. *Mencións ao Rexistro Central para a Protección das Vítimas da Violencia Doméstica e de Xénero.*

As mencións efectuadas no Real decreto 95/2009, do 6 de febreiro, ao Rexistro Central para a Protección das Vítimas de Violencia Doméstica entenderanse efectuadas ao Rexistro Central para a Protección das Vítimas da Violencia Doméstica e de Xénero, conforme o disposto no artigo 544.ter.10 da Lei de axuízamento criminal, na redacción dada polo artigo segundo.sesenta e un da Lei 13/2009, do 3 de novembro, de reforma da lexislación procesual para a implantación da nova oficina xudicial.

Disposición derradeira única. *Entrada en vigor.*

Este real decreto entrará en vigor aos vinte días da súa publicación no «Boletín Oficial del Estado».

Dado en Madrid o 14 de novembro de 2011.

JUAN CARLOS R.

O ministro de Xustiza
FRANCISCO CAAMAÑO DOMÍNGUEZ